



ILIDŽA

INFORMATIVNI BILTEN OPĆINE ILIDŽA
Ilidža • Novembar 2013. • Broj 121





SVEČANA SJEDNICA OPĆINSKOG VIJEĆA



Proslavljen Dan državnosti

U povodu obilježavanja 25. novembra, Dana državnosti BiH, 22. novembra održana je svečana sjednica Općinskog vijeća Ilidža.

„Ovo je prilika sjetiti se svih vrijednosti borbe za ljudska prava, borbe protiv fašizma, borbe za slobodu i uvijek isticati značaj ovog velikog datuma u historiji naše zemlje. Tog 25. novembra 1943., ključnog datuma u izgradnji savremene državnosti BiH, održano je prvo zasjedanje ZAVNOBIH-a i u toj novembarskoj noći, obnovljena je državnost BiH, potvrđen njen historijsko-politički i državno-pravni identitet, formirana federalna BiH, praktično država, što je i najveća tekovina anifašističkog rata. Ono kroz sve što je Bosna proživjela utjeha nam je istorijska činjenica da Bosnu otkako ona postoji nikad niko nije uspio podijeliti.

Bosna i Hercegovina je svoj teritorijalni integritet i cjelovitost sačuvala od srednjovjekovne države do danas, iako nekad teško ranjena nadživjela je svoje osvajače i djelatelje“ rekla je, između ostalog, u svom govoru predsjedavajuća Općinskog vijeća Ilidža Smiljana Viteškić.

Dr. Viteškić je podsjetila da je obaveza svih nas da obilježavamo ovaj datum, jer se tako prisjećamo bogate dugogodišnje istorije Bosne i Hercegovine, jednako otvorene za sve njene narode.

„Naš put je put zajedničkog života, međureligijske tolerancije, poštovanja i borbe za održavanje multietičnosti BiH“, kazala je dr. Smiljana Viteškić, predsjedavajuća Općinskog vijeća Ilidža i uputila čestitku svim Bosancima i Hercegovcima.

Učenici Druge osnovne škole izveli su prigodan program.



TEMATSKA SJEDNICA OPĆINSKOG VIJEĆA

Prezentacija elaborata „Sarajevsko polje“

Zavod za izgradnju Kantona Sarajevo je po zaduženju Vlade Kantona, na osnovu provedbenog postupka za nosioca izrade projekta, odnosno elaborata o zaštiti izvorišta vode za piće „Sarajevsko polje“ odabrao Institut za hidrotehniku Građevinskog fakulteta u Sarajevu. Elaborat čiji je sastavni dio Odluka o zaštiti izvorišta vode za piće „Sarajevsko polje“, završen je u maju 2013. godine te je javno i prezentiran 9. oktobra u Kantonu Sarajevo. Elaboratom su obuhvaćeni istražni radovi i definiran obuhvat i granice zaštitnih zona. Prezentacija je upriličena u Općini Ilidža 12. novembra radi prikupljanja primjedbi, mišljenja i sugestija na navedeni elaborat i odluku o zaštiti izvorišta za piće „Sarajevsko polje“. Izvorište Sarajevsko polje sa kojeg se snabdijeva oko 90% stanovništva, prvi put nakon 40 godina trebalo bi biti uređeno i zaštićeno na konkretan način. Predviđeno je to ovim elaboratom. Stručnjaci tvrde da građani Sarajeva piju vodu dobrog kvaliteta, ali i da je to područje neophodno zaštititi kako ne bi došla u pitanje njena ispravnost. Zaštita područja gdje se nalaze izvorišta vode za piće mora biti prioritet svakog društva. Izradom Elaborata jasno su određene smjernice i pravila ponašanja stanovništva i šire zajednice. Sliv izvorišta Sarajevsko polje proteže se na teritoriji općina Ilidža, Hadžići i Trnovo u FBiH i Kasindo u manjem bh. entitetu. Područje prve zaštitne zone Sarajevsko polje obuhvata neposredan prostor oko vodozahvatnih objekata, kojim se ovi objekti štite od slučajnog ili namjernog zagađenja ili oštećenja. Ukupna površina prve zaštitne zone, oko izvorišta Sarajevsko polje iznosi 0.67 kilometra kvadratna.

Općina Ilidža će u skladu sa važećim propisima o eksprijaciji regulisati pitanja imovinsko-pravnih odosa sa sadašnjim vlasnicima zemljišta na području prve zaštitne zone, a troškove će snositi Kanton Sarajevo, rečeno je na prezentaciji.



Kantonalno javno komunalno preduzeće „Vodovod i kanalizacija“ nadležno je za provođenje svih zaštitnih mjera i saradivati će prilikom provođenja mjera iz svoje nadležnosti sa Kantonalnom javnom ustanovom za zaštićena područja. Najveći zagađivači, kaže Dalila Jabučar iz Instituta za hidrotehniku Građevinskog fakulteta u Sarajevu, u prostoru „Sarajevsko polje“ su septičke jame, deponije smeća, minska područja i izgrađene ceste.

„Općina Ilidža i njeni stanovnici na ovakvu odluku i dokument čekaju već 40 godina i na taj način će se spriječiti bespravna gradnja i omogućiti će Ilidži da se razvija u okviru zakonskih propisa, koje regulišu ovaj dokument“ rekao je, između ostalog, načelnik Općine Ilidža prof. dr. Senaid Memić.

Kolegij Općinskog vijeća i načelnik, imenovat će tim, odnosno komisiju koja će dati svoje prijedloge i sugestije na elaborat.

Prezentaciji su prisustvovali predsjednici klubova stranka Općinskog vijeća, predstavnici Vlade Kantona Sarajevo, Zavoda za izgradnju Kantona Sarajevo, Građevinskog fakulteta i građani.

Prva tematska sjednica Općinskog vijeća

Analiza dosadašnjeg funkcionisanja i prijedlozi mjera za poboljšanje rada Javne ustanove Kulturno-sportski i rekreacioni centar Ilidža i Javne ustanove za kulturu, sport i rekreaciju Hrasnica-Ilidža bile su teme prve tematske sjednice Općinskog vijeća Ilidža održane 12. novembra 2013. godine. Vijeće je donijelo zaključak da se uz pomoć eksperata iz struke osmisli budući razvoj i prijedlog reorganizacije javnih ustanova čiji osnivač je Općina Ilidža i da se prilikom izrade elaborata ekonomske opravdanosti uzmu u obzir i raniji zaključci Vijeća koji se odnose na rade ovih javnih ustanova. Također, donešen je zaključak da se formira mješovita stručna komisija sastavljena od predstavnika Vijeća, općinskog načelnika i javnih ustanova čiji zadatak je da do usvajanja budžeta napravi presjek stanja realnih budžetskih potreba javnih ustanova za 2014. godinu, te da se prema Parlamentu



FBiH uputi inicijativa za donošenje Zakona o javnim ustanovama i da se riješi status Multimedijalnog centra (bivše kino Igman).



REDOVNA SJEDNICA OPĆINSKOG VIJEĆA

Utvrđen Nacrt budžeta Općine Ilidža za 2014. godinu

Općinsko vijeće Ilidža na 11. redovnoj sjednici, održanoj 28. novembra 2013. godine, utvrdilo je Nacrt budžeta Općine Ilidža za 2014. godinu u iznosu od 21.550.000,00 KM i uputilo ga na javnu raspravu. Javne rasprave o Nacrtu budžeta održat će se od 28. novembra do 15. decembra 2013. godine u mjesnim zajednicama prema utvrđenom rasporedu. Nacrt budžeta sa rasporedom održavanja javnih rasprava po mjesnim zajednicama objavit će se na oglasnoj ploči, web stranici Općine i oglasnim pločama mjesnih zajednica. Za organizaciju i provođenje javne rasprave zadužen je Općinski načelnik, koji je obavezan na narednoj sjednici Općinskog vijeća podnijeti izvještaj o rezultatima javne rasprave i pripremiti prijedlog budžeta Općine Ilidža za 2014. godinu.

Utvrđen Nacrt Strategije razvoja lokalnih cesta općine Ilidža

Vijeće je utvrdilo Nacrt Strategije razvoja lokalnih cesta općine Ilidža za period 2014 - 2024. godine i uputilo ga na javnu raspravu koja će se održati u periodu od 28. novembra do 28. decembra 2013. godine. Za vrijeme trajanja javne rasprave Nacrt Strategije biće objavljen na web stranici Općine i svi zainteresovani mogu u pisanoj formi dostaviti svoje primjedbe, prijedloge, mišljenja i sugestije Službi za razvoj, investicije i komunalne

Odluka o pristupanju izrade Urbanističkog projekta „Memorijalni muzej opsade grada Sarajeva na lokalitetu tunela DB Dobrinja-Butmir“

U skladu sa inicijativom Ministarstva za boračka pitanja Kantona Sarajevo Općinsko vijeće je donijelo Odluku o pristupanju izrade Urbanističkog projekta „Memorijalni muzej opsade grada Sarajeva na lokalitetu Tunela DB Dobrinja-Butmir“ radi definisanja koncepta prostornog uređenja u novim korigovanim granicama obuhvata u odnosu na Odluku iz 2002. godine a prema prijedlozima i sugestijama nosioca pripreme za izradu planskog dokumenta. Izrada plana će se vršiti prema Odluci o stavljanju dobara baštine pod zaštitu kojom je nekretnina Spomenički kompleks Tunel D-B proglašen zaštićenim dobrom baštine II kategorije i Odluke o usvajanju projekta „Opsada i odbrana Sarajeva 1992-1995. godine.



poslove putem Centra za pružanje usluga građanima Općine Ilidža. Rasprava o Nacrtu Strategije održat će se 18. decembra 2013. godine u 17 sati u Multifunkcionalnoj sali Općine na kojoj će prisustvovati predstavnici mjesnih zajednica, ustanova i javnih preduzeća na koje se Strategija neposredno odnosi kao i svi ostali zainteresovani. Za organizaciju i provođenje javne rasprave zadužena je Služba za razvoj, investicije i komunalne poslove koja je obavezna da podnese izvještaj o rezultatima javne rasprave i dostavi Općinskom vijeću Prijedlog Strategije razvoja lokalnih cesta općine Ilidža za period 2014 - 2024. godine na usvajanje.

Nacrt odluke o nerazvrstanim cestama na javnoj raspravi

Općinsko vijeće je na dnevnom redu imalo i Nacrt Odluke o nerazvrstanim cestama na području općine Ilidža, koji je upućen na javnu raspravu u trajanju 15 dana. Nacrt Odluke o nerazvrstanim cestama Općine Ilidža u toku trajanja javne rasprave 15 dana, bit će postavljen na web stranici Općine i svi zainteresirani subjekti će moći u pisanoj formi dostavljati svoje prijedloge, kao i putem Centra za pružanje usluga građanima Općine Ilidža. Nakon provedene javne rasprave zadužena je Služba za razvoj, investicije i komunalne poslove da podnese Općinskom vijeću izvještaj o rezultatima javne rasprave i dostavi na usvajanje prijedlog navedene odluke.



Pokrenuta inicijativa za uspostavu saradnje Općine Ilidža i Grada Rijeke

Općinsko vijeće na posljednjoj sjednici pokrenulo je inicijativu za uspostavu saradnje Općine Ilidža i Grada Rijeke. Cilj ove saradnje je unaprijeđenje znanja i iskustva u organizovanju rada na lokalnom nivou, zbog činjenice da je Republika Hrvatska uspješno okončala proces evropskih integracija.

Namjera Općine Ilidža je da sa Gradom Rijekom u okviru ove saradnje razmijeni iskustva na donešenju akata lokalne zajednice u skladu sa evropskim zakonodavstvom, a i ostvari saradnju u oblasti privrede sa naglaskom na turizam, kao i saradnju sa vijećnicima nacionalnih manjina Grada Rijeke.

Usvojena Odluka o poslovnim zonama

Općinsko vijeće na 11.redovnoj sjednici održanoj 28. novembra 2013. godine donijelo je Odluku o poslovnim zonama općine Ilidža. Tom odlukom utvrđuju se poslovne zone na području općine Ilidža, a razvrstavanje poslovnih zona i raspored ulica u poslovne zone vrši se prema njihovoj položajnoj pogodnosti, zavisno od frekventnosti ljudi, saobraćajnog prometa i dostupnosti saobraćajnicama i sredstvima komunikacije. Područje općine Ilidža dijeli se na pet poslovnih zona, i to: extra zona, prva poslovna zona, druga poslovna zona, treća poslovna zona, četvrta poslovna zona.

Prijedlozi akata o regulisanju imovinsko pravnih odnosa

Općinsko vijeće na 11. sjednici donijelo je prijedloge zaključaka o neprihvatanju ponuda sljedećih nosioca prava korištenja: Tatjana Zovko, Dojčilo Babalj, Abdulah Lalić, Fadil Botulja i dr., Milorad Babić i Zorka Babić, Radivoj Maksimović, Borka Kokotović, rođ Jokić i Strahinja Jokić, te Amir Hadžić.

Općinsko vijeće prihvatilo je i prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima: Enver Uzunović, Nikola Ostojić i Saliha Karić, te prijedlog rješenja o rješavanju imovinsko-pravnih odnosa u svrhu privođenja krajnjoj namjeni: izgradnje vjerskog objekta džamije u Gladnom polju.

Prijedlog rješenja o rješavanju imovinsko -pravih odnosa u svrhu preuzimanja izgrađenog gradsko-građevinskog zemljišta zbog privođenja krajnjoj namjeni Vidosave Babić i drugih., te prijedlog rješenja o davanju saglasnosti za otuđenje nedovršene stambene zgrade po zahtjeu Envera Čenanovića, također su usvojeni.

U ovoj godini zbrinuto 220 pasa

Informacija o zbrinjavanju pasa lotalica na području Općine Ilidža našla se na dnevnom redu 11. sjednice Općinskog vijeća Ilidža.

Kako se navodi u Informaciji koju je pripremila Zemljoradnička zadruga Ilidža, koja ima izgrađen azil odnosno Prihvatilište za pse, u ovoj godini zbrinuto je 220 pasa. Svi ovi psi su sterilisani i kastrirani.

Najveći problem, kako se navodi u Informaciji, predstavljaju građani koji dovode mladunčad pasa za koju u ZZ Ilidža nema uvjete za zbrinjavanje, a i agresivni psi u Hrasnici I i II.

Općinsko vijeće dalo je podršku poslanici Parlamenta BiH Nermini Zaimović-Uzunović na pokrenutoj inicijativi na izmjeni Zakona o zaštiti i dobrobiti životinja i predlaže da se izmjene ovog zakona hitno stave u parlamentarnu proceduru sa ciljem konačnog rješavanja ovog gorućeg problema BiH.



Donacija 100.000 KM Domu zdravlja Ilidža

Sporazum o namjenskom korištenju sredstava za izmještanje kotlovnice Organizacione jedinice Dom zdravlja Ilidža i sufinansiranje nabavke rentgen aparata za ATP Ilidža, potpisan je 21. novembra u Općini Ilidža. Sporazum su potpisali načelnik Općine Ilidža prof. dr. Senaid Memić i generalna direktorica JU Doma zdravlja Kantona Sarajevo doktorica Dženana Tanović.

Za izmještanje kotlovnice OJ Dom zdravlja Ilidža i sufinansiranje rentgen aparata za ATP Ilidža, Općina Ilidža odobrila je iz Budžeta 100.000,00 KM.

“Ova donacija je vrlo značajna i potvrda dobre saradnje lokalne zajednice i Doma zdravlja Kantona Sarajevo” kazala je generalna direktorica Doma zdravlja KS dr. Dženana Tanović.

“Od ove donacije najviše koristi imat će naši pacijenti, odnosno građani ove općine. Naša Općina uvijek je imala razumijevanja za potrebe koje mi imamo, te želim istaći da smo vrlo zadovoljni saradnjom. Ova sredstva će se utrošiti za kupovinu novog rentgen aparata za snimanje pluća i to 70.000 KM i 30.000 za izmještanje kotlovnice u OJ Dom zdravlja Ilidža” izjavila je direktorica Doma zdravlja Ilidža Džana Šaćić.



“Naša obećanja koja smo dali Domu zdravlja Ilidža, smo i ispunili. Ističem zadovoljstvo jer možemo kao lokalna zajednica izdvojiti sredstva za kupovinu rentgen aparata za potrebe naših građana, kako ne bi dugo čekali na preglede.

Nadamo se da će donacija koristiti onima kojima je namijenjena i da ćemo i u idućoj godini izdvojiti sredstva za neki drugi aparat za potrebe naših građana” izjavio je načelnik Općine Ilidža prof. dr. Senaid Memić.

Donacijom će se pomoći opremanje prostorija Pneumoftiziološkog dispanzera, kojim će biti odvojeni pacijenti koji trebaju usluge ovog dispanzera od ostalih pacijenata.

Zaštita od poplava rizičnih područja općine Ilidža

Teritorija općine Ilidža spada u red najugroženijih općina od poplava na području Kantona Sarajevo. Ukupna dužina vodotoka Bosne, Željeznice, Miljacke, Dobrinje, Tilave, Zujevine, Buničkog potoka, Večerice i Rakovičkog potoka kroz područje općine Ilidža iznosi 48,5 kilometara, a najugroženije mjesne zajednice su Stup, Otes, Osijek i Blažuj. U skladu sa Zakonom o zaštiti i spašavanju ljudi i materijalnih dobara od prirodnih i drugih nesreća, zaštita i spašavanje na vodi i pod vodom je mjera koja sadrži provođenje zaštite i spašavanja ljudi

i materijalnih dobara u područjima oko rijeka i jezera koja mogu biti ugrožena poplavama bila je jedna od tačaka dnevnog reda 11. redovne sjednice Vijeća. Poslije iscrpne rasprave Vijeće je donijelo Zaključak da se i dalje provodi i ispoštuje Zaključak sa treće tematske sjednice održane 4. aprila 2012. godine posvećene ovoj problematici, a posebno tačka šest zaključka kojom se obavezuje Služba civilne zaštite Općine da za svaku sjednicu Vijeća dostavi informaciju o stanju na terenu vezano za zaštitu od poplava na svim rizičnim lokalitetima. Takođe se obavezuje Agencija za vodno područje rijeke Save da blagovremeno izvještava Općinu o svojim poduzetim aktivnostima i operativnim sredstvima vezanim za ovu problematiku.

Delegacija Općinskog vijeća Centar u posjeti Općinskom vijeću Ilidža

Rukovodstvo Općinskog vijeća Ilidža posjetili su 8. novembra predsjedavajuća Općinskog vijeća Centar Varja Nikolić i dopredsjedavajući Nedžad Ajnadžić.

Tokom razgovora razmijenjena su iskustva u radu vijeća, te o problemima sa kojim se suočavaju.

Zajednički su konstatovali da je neophodno sastajanje jednom mjesečno predsjedavajućih iz Kantona Sarajevo, kako bi zajednički delegirali probleme i pronašli rješenja.





Rezidencionalno naselje u Sokolović-Koloniji

Svečana primopredaja jednog stambenog objekta u okviru projekta Ardh-Al-Jazeera u Sokolović-Koloniji upriličena je 31. oktobra 2013. godine.

„Ovo je jedan od dva projekta izgradnje individualnih stambenih objekata kojih će u Sokolović-Koloniji biti 18. Vrijednost projekta iznosi četiri miliona eura. Planiramo i u Dobroševićima graditi 32 stambena objekta. Ukupna vrijednost oba projekta je 12 miliona eura a finansijer je firma Ardh-All Jazeera“ rekao nam je investitor i vlasnik firme Kuvajćanin, Daifalan Alotaibi, koji namjerava nastaviti sa ovakvim projektima u čitavoj BiH.

„Kuće će biti ponudene na tržištu kako kuvajtskim tako i bh. državljanima, a sve bi trebalo biti okončano za dva mjeseca,“ dodao je Alotaibi.

Načelnik Općine Ilidža prof. dr. Senaid Memić je obećao kako će pomoći da administrativne procedure ne budu prepreka razvoju Ilidže i učiniti će ih što jednostavnijim.

„Ovi projekti su svjedoci sigurnih investicija koje možemo garantovati svima koji žele da grade u našoj



općini. Nadamo se da će naša država omogućiti vlasništvo strancima nad nekretninama i uspostaviti bolje avionske letove sa glavnim gradovima arapskih zemalja, kako bi što više turista moglo stizati u našu državu. Samo smo na Ilidži pripremili investicije, odnosno projekte vrijedne dvije milijarde KM, čiji nosioci bi trebali biti kuvajtski investitori. Ako započnemo intenzivniji ekonomski razvoj sigurno će to donijeti i politički mir u našoj zemlji“ izjavio je načelnik Općine Ilidža prof. dr. Senaid Memić. Primopredaji u Sokolović-Koloniji prisustvovao je i ambasador Kuvajta u BiH dr. Masser Reden Al Motairi koji ove projekte smatra načinom učvršćivanja dobrih veza dvije države.

Počela izgradnja treće faze saobraćajnice uz rijeku Željeznicu

U naselju Sokolović- Koloniji počela je izgradnja treće faze saobraćajnice uzvodno uz Željeznicu od mosta Alije Izetbegovića do Mosta spasa. Finansijer radova je Općina Ilidža, a vrijednost projekta je 240.102,88 KM. Radove će nadzirati Zavod za izgradnju Kantona Sarajevo. Ukupna dužina saobraćajnice je 220,74 metara, a radovi si povjereni firmi TB Inžinjeri d.o.o. Breza. Javnu rasvjetu radit će firma Testingelektro d.o.o., a rok izvođenja radova je 120 dana.



Počela izgradnja Kasindolske tramvajske stanice

Izgradnja tramvajskog stajališta Rustempašina-Kasindolska započela je 5. novembra. Građevinske radove izvodi firma „Bucomerc“ d.o.o Kiseljak.

Saobraćajnu signalizaciju radit će firma „Step d.d“ a nadzor će vršiti Zavod za izgradnju KS.

Sredstva su obezbijedila Općina Ilidža, Ministarstvo saobraćaja i Direkcija za ceste. Rok izvođenja radova je 40 dana.



Ilidžanac Tarik Stambolić pobjednik Festivala narodne muzike „Ilidža 2013“



Općina Ilidža i BHRT i ove godine organizovali su Ilidžanski festival. Festival narodne muzike „Ilidža 2013“ održan je 22. i 23. novembra 2013. godine u Kulturno-sportskom centru Ilidža. Opet je to bio spoj mladosti i iskustva, s ciljem očuvanja tradicije ovdašnjih naroda i promocije turizma.

U Kulturno-sportskom centru Ilidža 23. novembra je održan takmičarski dio manifestacije Festival narodne muzike „Ilidža 2013“. Čuveni Ilidžanski festival ljubiteljima izvorne narodne pjesme još jednom je priuštio noć u kojoj su imali priliku istinski uživati uz sevdah.

Zahvaljujući najvećem broju glasova televotingai žirija, pobjedio je Ilidžanac Tarik Stambolić, pjevajući pjesmu „Azra“.

„Hvala svima koji su glasali za mene. Moj životni san je večeras ispunjen „ rekao je pobjednik, naš sugrađanin Tarik Stambolić.

U takmičarskom dijelu nastupilo je 16 afirmiranih estradnih umjetnika.

Takmičili su se: Afan Smajlović, Neno Murić, Tarik Stambolić, Ilijas Gadžo, Tamburaški sastav „Geraši“, Azra Husarkić i Davor Badrov, Asim Brkan, Šaćir Ameti, Jasmin Burek, Salem Ćorić, Sajid Jusić, Zijad Kasumović, Refik Kolić, Aldijana Tuzlak-Bećar, Tufo Veletanlić i Šeščet Šeki Bihorac.

U revijalnom dijelu nastupio je Amar Jašarspahić.

Prva festivalska noć „Sve ljepote ilidžanskih festivala“ održana je 22. novembra i imala je revijalni karakter. Učestvovala su brojne zvijezde narodne muzike, čije su pjesme bile hitovi Ilidže. U pratnji Narodnog orkestra BHRT-a nastupili su: Nedžad Salković, Ljubica Berak, Muhamed Mujkanović, Emir Dedić, Marinko Rokvić, Ramiza Milkunić, Reuf Feković, Rizo Hamidović, Branka





Sovrlić, Hamid Ragipović Besko, Hasiba Agić, Šerif Konjević, Enes Begović i Nihad Alibegović. Voditelji Festivala bili su Maja Miralem i Rinko Golubović.

„Izuzetno sam sretan jer sam na Ilidži poslije mnogo godina. Prvi put sam se takmičio 1979. godine. Ona u meni budi posebne emocije. Ovdje su se nekad sastajali najbolji interpretatori narodne muzike i počinjali svoju karijeru. Danas, mladi žele preskočiti sve ove stepenice koje smo mi imali i preko noći postati zvijezde. Mislim da mnogi trebaju još mnogo da uče o pjevanju ali svakako svima želim sreću u ovom poslu“ kazao nam je Marinko Rokvić.

„Davne 1984. bio sam najmlađi učesnik Ilidžanskog festivala. To je nekada bio najprestižniji festival narodne muzike koji je iznjedrio najjača muzička imena, poput Safeta Isovića, Zaima Imamovića, Mehe Pužića, Hanke Paldum, Šabana Šaulića... Moram priznati da su se tada pjevale dosta kvalitetnije pjesme koje su više naginjale na sevdah. Na nastupu „Ilidža 2009“ bio sam apsolutni pobjednik i ta pobjeda je mnogo utjecala na moju karijeru. Kada bih podvukao crtu tada 1984 i sada nastupao bi sa istim žarom. Takmičarima želim puno sreće i da ovo preraste u tradicionalnu manifestaciju“ izjavio nam je Enes Begović.

Muhamed Mujkanović, čovjek koji je doživio porodičnu tragediju, uvijek se odazove i svojim pjesmama oduševi publiku

„Za mene je Ilidža nešto što je vrijedno poštovanja. Ovdje se uvijek lijepo osjećam i publika uvijek osjeti emociju koju im pošaljem. Mladim izvođačima koji se takmiče na ovom festivalu želim puno sreće u budućoj karijeri“, rekao je Mujkanović.



Festival je prvi put održan 1964. godine. Godinu ranije je održan susret izvođača i pjevača narodne muzike Ilidža 63., koji je imao karakter probe i ispitivanja pulsa publike. Na osnovu toga je i odlučeno da to postane trajna manifestacija.

Godine su prolazile, Festival je stekao izuzetnu popularnost i značaj u svijetu narodne muzike o čemu govori i 1.600.000 prodatih ploča sa Festivala 1969. godine ili 500 prijava za Festival Ilidža 1972., kao i neka od imena koja su obilježila narodnu muziku poput Zaima Imamovića, Nedeljka Bilkića, Bebe Selimovića, Safeta Isovića, Dragana Živkovića Tozovca, Mehe Pužića, Zehre Deović, Miroslava Ilića, Nedžada Salkovića, Zekerijaha Đezića, Hanke Paldum, Harisa Džinovića, Šabana Šaulića, Tome Zdravkovića i mnogih drugih izvođača, ali i autora koji su legende narodne muzike.

Ilidžanske pjesme se i danas pjevaju, a stižu i nove nade i nove pjesme.





U toku izgradnja treće faze saobraćajnice Ilidža- Hrasnica

U toku je izgradnja treće B faze saobraćajnice sa tramvajskim pojasom Ilidža- Hrasnica (Dionica 1).

Izvođač radova je preduzeće Bosman d.o.o. Radove finansira Općina Ilidža u iznosu 1. 221. 555, 17 KM. Ugovorom su predviđeni radovi nastavka izgradnje desne kolovozne trake sa pješačkom stazom u ukupnoj dužini 560 metara, sa privremenim priključkom na postojeću Hrasničku cestu i projekat će se realizirati dvije godine.

Stručni nadzor za praćenje realizacije projekta povjeren je Zavodu za izgradnju Kantona Sarajeva.

Radovi obuhvataju iskope, zamjenu podla, polaganje geomembrane i oborinske kanalizacije i drenaže, asfalt na kolovozu i pješačkoj stazi, te potrebnu signalizaciju. Javnu rasvjetu radit će firma Testingelektro d.o.o.



Odobreno još 15 plastenika

O pćinski načelnik prof. dr. Senaid Memić, na prijedlog Komisije za dodjelu plastenika, donio je odluku da se dodijeli još 15 plastenika, površine 100 kvadratnih metara sa dodatnom opremom. Ugovore je uručio 4. novembra u sali Općine Ilidža

Plastenike su dobili: Azemina Zulović, Selim Begović, Enisa Alibašić, Kata Balta, Mujo Čorbo, Senad Vreto, Elvedin Salkić, Hamza Šeta, Vahid Džaltur, Adila Briga, Ehlimana Dervišević, Ismet Stambolić, Nezir Prljača, Izet Kovač i Hasim Maličević.



Asfaltiranje na području Ilidže

Na području općine Ilidža završeno je asfaltiranje ulica Vidovci, Stanjavac, Bistrički put. Stanovnici ulice Vidovci dobili su asfalt u dužini 450 metara. Za taj posao Općina Ilidža je izdvojila 65.000 KM, a radila ga je firma KJKP"Rad". Završeno je asfaltiranje i kraka ulice Bistrički put. Općina Ilidža finansirala je ovaj projekat u vrijednosti 19.000 KM, a posao je bio povjeren firmi "Sarajevoputevi", kao i radove u dužini od 80 metara u ulici Stanjevac. Za asfaltiranje ulice Stanjevac izdvojeno je 12.000 KM. U općini Ilidža konačno je asfaltiranje i ulice Zuhdije Kadrića, u dužini 300 metara i vrijednosti 31.000 KM. Radove je izvodila firma KJKP"Rad", a finansirala Općina Ilidža.

Također, završeno je asfaltiranje ulice Lužansko polje u dužini 93 metra. Općina Ilidža je finansirala u vrijednosti 50.000 KM, a KJKP"Rad" su bili izvođači radova.

Okonačni su radovi asfaltiranja i kraka Rakovička cesta u dužini 135 metara. Izvođač radova bila je firma "Sarajevoputevi," a finansijer je Općina Ilidža, 19.000 KM.

Za zimsko održavanje zadužene tri firme

Zimsko održavanje cesta na području općine Ilidža povjereno je firmama "Bosman" d.o.o., "Grakop" d.o.o. i firmi KJKP "Rad". Firma Bosman održavat će ceste u dužini od 47.335 metara, Grakop u duljini od 52.126 metara a firma KJKP "Rad" održavat će ceste u dužini od 23.641 metara.



Obuka za matičare i druga lica općinskih službi za matične knjige

Federalno ministarstvo unutrašnjih poslova u saradnji sa međunarodnom organizacijom UNHCR, a uskladu sa planom i programom organizovalo je stručnu obuku za matičare, državne službenike i namještenike općinskih službi za matične knjige koji neposredno obavljaju poslove upisa u matične knjige i utvrđuju činjenice i podatke koji se upisuju u matične knjige. Obuka za općine iz Kantona Sarajevo održana je 14. novembra 2013. godine u Multifunkcionalnoj sali Općine Ilidža. Obukom su obuhvaćene teme obrade konkretnih pitanja iz oblasti matičnih knjiga, porodičnih odnosa i upravnog postupka. Obuku su izvodili Medina Đapo, pomoćnica ministra, Milenko Lepušina pravni ekspert i Suzan Bubić, profesor na Pravnom fakultetu u Mostaru.

Podijeljeno 7000 sadnica

Općina Ilidža u novembru 2013. godine podijelila je 7.000 sadnica višnje, šljive, trešnje, jabuke i kruške u 16 MZ.

U MZ Butmir podijeljeno je 325 sadnica, u Donjem Kotorcu 297, Sokolović-Koloniji 390, Hrasnici I 653, Hrasnici II 478, Ilidža Centar 325, Lužanima 200, Vreoca 130, Vrelo Bosne 130, Blažuj 455, Rakovica 450, Osjek 872, Otes 460, Stup 555, Stup II 455 i Stupsko Brdo 325 sadnica.

Za stipendiju se prijavio 121 kandidat

Službi za rad, socijalna pitanja, zdravstvo, izbjeglice i raseljena lica Općine Ilidža u roku od 15 dana koliko je bio otvoren Konkurs za stipendiranje učenika slabijeg imovnog stanja tj. do 19. novembra, prijavio se 121 kandidat (64 učenika javnih ustanova srednjih škola i 57 studenata visokoškolskih ustanova članica Univerziteta u Sarajevu).

Služba trenutno obrađuje podatke i imena kandidata koji su ostvarili pravo na stipendiju. Rezultati se očekuju do kraja decembra, rečeno nam je u ovoj službi.

Na ovaj konkurs stipendije bi trebalo dobiti 40 učenika srednjih škola i 50 studenata.

Ujedno, u toku je obrada podataka za stipendiranje djece bez oba roditelja i roditeljskog staranja.

Prijavilo se 337 kandidata

Na prijedlog Službe za obrazovanje, kulturu, sport i informisanje, Općinski načelnik je 18. oktobra 2013. godine u dnevnom listu „Oslobođenje” raspisao Konkurs za stipendiranje talentovanih učenika u srednjem i studenata u visokoškolskom obrazovanju u školskoj/akademskoj 2013/2014. godini.

U predviđenom roku od 15 dana od dana objavljivanja konkursa tj. do 4. novembra tekuće godine prijavilo se 337 kandidata (126 učenika javnih ustanova srednjih škola i 211 studentata visokoškolskih ustanova članica Univerziteta u Sarajevu), od kojih 243 ispunjava uslove Konkursa i to 80 učenika i 163 studenta.

Svi redovni učenici i studenti koji su zadovoljili kriterije bit će stipendirani, na prijedlog Općinskog načelnika, donošenjem Odluke o stipendiranju talentovanih učenika i studenata, koja će biti razmatrana na decembarskoj sjednici Općinskog vijeća Ilidža.

Učenici srednjih škola i studenti prve godine fakulteta koji ne zadovoljavaju kriterije (privatne srednje škole, prosjek ocjena manji od 5,0 od trećeg do devetog razreda osnovne škole, odnosno predhodne školske godine za učenike drugog, trećeg i četvrtog razreda, te upisana prva godina na privatnom fakultetu), kao i studenti od druge do šeste godine (privatni fakulteti, prosjek ocjena iz akademske 11/12 - obnavljali godinu, prosjek ocjena manji od 7,5 za grupaciju tehničkih i medicinskih nauka, prosjek ocjena manji od 8,0 ostalih fakulteta/akademija), bit će pismeno obaviješteni o rezultatima izbora u roku od 15 dana nakon donošenja odluke o stipendiranju učenika/studenata.



Okrugli stol „Osnivanje dnevnog centra za djecu i omladinu s teškoćama u razvoju“

Osnivanje Dnevnog centra za djecu i omladinu sa teškoćama u razvoju sa područja općine Ilidža bila je tema okruglog stola održanog u Hotelu Hollywood 27. novembra 2013. godine.

Organizatori, majke djece sa teškoćama u razvoju, željeli su ukazati na značaj osnivanja jednog socijalnog servisa ovog tipa za djecu i omladinu s teškoćama u razvoju. Centar bi korisnicima omogućio adekvatnu medicinsku njegu i rehabilitaciju i podršku roditeljima.

„Osnivanje ovog centra bilo bi od velikog značaja za našu djecu. Omogućio bi socijalizaciju djeteta, adekvatnu rehabilitaciju, a prije svega djeca se ne bi osjećala prepuštena sami sebi. Ima mnogo majki kojima bi ovaj centar pomogao da razmjene iskustva, razgovaraju o svo-



jim problemima i savjetima pomognu jedne drugima, jer mi se ipak najbolje razumijemo“, kazala nam je Natalija Dijaković, jedna od inicijatorki okruglog stola.

Na okruglom stolu učestvovali su predstavnici Međunarodne humanitarne organizacije, Centra za socijalni rad, Općine Ilidža, UNICEF-a.



Učenici Četvrtе gimnazije obilježili Dan srednjoškolaca i Dan tolerancije

U povodu obilježavanja Dana srednjoškolaca i Dana tolerancije u Četvrtoj gimnaziji Ilidža 18. novembra 2013. godine održana je prezentacija projekta koju su pripremili Vijeće učenika ove škole.

Nakon obraćanja direktora škole Šefika Dželilovića, pušteno je 40 različitih balona koji su simbolizirali različitost, a učenicu su mijenjali profesore i predavali po jedan školski čas.

„Mi smo željeli da zamijenimo uloge jedan dan s našim profesorima, da jedan dan vidimo odgovornost koju oni imaju, a oni su se vratili u klupe i prisjetili se kako je biti učenik. Puštanjem raznobojnih balona željeli smo pokazati različitosti, ali da smo opet svi jednaki i imamo ista prava,“ rekla nam je učenica ove škole Meliha Kovačević.

Igmanski izviđači proslavili 55. rođendan

Ored izviđača „Igman 92“ je 30. novembra 2013. godine u Multimedijalnom centru Ilidža obilježio 55 godina postojanja i izviđačke tradicije na Ilidži.

U okviru svečane akademije izvršena je i dodjela izviđačkih priznanja i odlikovanja Saveza izviđača FBiH.

„Uz svesrdnu pomoć Općine Ilidža i velikog broja simpatizera posebno privrednih subjekata, te velikog broja novih članova na nivou Federacije, postigli smo zavidne rezultate. Iskorakom smatram učešće izviđačkih ekipa iz RS-a, kao i susjednih država Srbije i Hrvatske, što dokazuje i njihovo učešće na ovoj svečenosti. Mislim da važno za jedan od najboljih odreda u Federaciji BiH što pokazuje porast novih članova,“ rekao nam je Ejub Fočo iz Savjeta odreda „Igman 92“.

Ovoj akademiji prisustvovao je veliki broj izviđača, gostiju iz Srbije, Hrvatske, Makedonije i Slovenije, kojima su uručene zahvalnice za dobru saradnju, te mnogobrojni prijatelji koji pomažu rad Odreda izviđača „Igman 92“ koji broji oko 150 aktivnih članova.





Promocija mladih umjetnika na IUS-u

Umjetnička galerija, „IUS Art Gallery“, smještena u okviru kampusa Internacionalnog univerziteta u Sarajevu (IUS), otvorena je za posjetioce 28. novembra 2013. godine. Cilj otvaranja ove umjetničke galerije je promocija mladih internacionalnih i lokalnih umjetnika koji su posvećeni istraživanju savremenih trendova u vizuelnoj umjetnosti. Namjera je da galerija bude mjesto gdje će se promovisati svjetske kulture i otkrivati nove umjetničke i estetske vrijednosti. Galerija će također biti otvorena za izlaganje različitih formi vizuelne umjetnosti u skladu sa raznolikim profilima posjetilaca. Prostor galerije je dizajniran kao multimedijalna prostorija, koja će, osim izložbi, biti otvorena za javna predavanja, konferencije, performanse, koncerte, filmove, festivale i druga kulturna dešavanja. Posebna pažnja je posvećena tome da prostor bude pristupačan svim građanima Sarajeva, uključujući i osobe sa posebnim potrebama.

Značaj otvaranja ovog atraktivnog galerijskog prostora u okviru kampusa IUS-a je utoliko veći što je ovo prvi izložbeni prostor na području općine Ilidža, koji će sigurno dati značajan doprinos kulturnoj i umjetničkoj sceni Sarajeva, te građanima i drugim posjetiocima pružiti interaktivno umjetničko iskustvo.

Prva umjetnička postavka koja će biti izložena u novoj galeriji, pod nazivom „Meandri spiritualizma“, je izložba renomirane bosansko-hercegovačka slikarke, Melihe Teparić. Umjetnica će se javnosti predstaviti sa opusom slika inspirisanih kufi kaligrafijom, transformisanom u oblike savremenog minimalističkog slikarstva, što je rijedak primjer uspješnog moderniziranja pomenutog stila, a što ne umanjuje predanost inicijalnom spiritualizmu. Meliha Teparić je, inače, docentica na Internacionalnom univerzitetu u Sarajevu na Odsjeku Vizuelnih umjetnosti i dizajna. Školovala se na Likovnoj akademiji u Sarajevu, a trenutno priprema doktorat na Odsjeku Povijest umjetnosti na Filozofskom fakultetu u Zagrebu.

Izložba će biti otvorena od 28. novembra do 28. decembra 2013. godine, svakim radnim danom od 12 do 18 sati. Ulaz u galeriju se ne naplaćuje.

Sedma osnovna najbolja u stolnom tenisu

U organizaciji Sportsko-rekreacijskog kluba „Kris-Kros“ u Desetoj osnovnoj školi 21. novembra 2013. održan je Treći turnir u stolnom tenisu ilidžanskih osnovaca. Prvo mjesto pripalo je učenicima Sedme osnovne škole, drugo Prve osnovne škole a treće učenicima El Manar. U ovom projektu čiji je pokrovitelj Općina Ilidža učestvovalo je sedam škola.

Turnir u stonom tenisu

U organizaciji stonoteniskog kluba „Ilidža“ i pod pokroviteljstvom Općine Ilidža, 16. i 17. novembra 2013. godine u sali Doma kulture Stupsko Brdo održan je „Drugi turnir ilidžanskih srednjoškolaca u stonom tenisu“. Od 64 takmičara prvo mjesto osvojio je Aner Opijač, drugo Mustafa Mišić, dok je treće mjesto zauzeo Amer Avdović. Zbog velikog interesa, osim za srednjoškolce, organizovano je takmičenje i za dječake starosti do 12 i 14 godina. U kategoriji do 12 godina prvo mjesto zauzeo je Džemal Bećiragić, drugo Ensar Gadžo i treće Namik Zilić. Prvoplasirani u kategoriji do 14 godina je Kenan Sejfović, drugoplasirani Ervin Vladić i trećeplasirani Ibrahim Puškar. Uz prigodan program koji su izveli članovi KUD-a „Bosnia“ najboljim takmičarima uručeni su pehari, medalje i knjige.



Četvrte igre bez granica ilidžanskih osnovaca

U sali za tjelesni odgoj Osme osnovne škole „Amer Čenanović“, 7. novembra 2013. godine realizovan je podprojekat „Četvrte igre bez granica ilidžanskih osnovaca“ koji je sastavni dio projekta „Vesela olimpijada ilidžanskih osnovaca“ pod pokroviteljstvom Općine Ilidža, a u organizaciji Sportsko-rekreacijskog kluba „Kris-kros“ i Javnih ustanova Prva, Šesta i Osma osnovna škola „Amer Čenanović“.

U takmičenju spretnosti učestvovali su učenicici iz osam osnovnih škola sa područja općine Ilidža. Šestočlane ekipe su se takmičile u osam disciplina i to: štafeta sa balonom, vodonoše, kašika i ping-pong loptica, trčanje u vrećama, ples u paru, ples oko stolice, sladoled i šampita.

Prvo mjesto sa istim brojem bodova osvojile su ekipe Osme osnovne škole „Amer Čenanović“ i Desete osnovne škole, dok je treće mjesto pripalo ekipi Devete osnovne škole. Svim učesnicima dodijeljene su zahvalnice, a pobjednicima pehari i medalje. U zabavnom dijelu programa nastupila je Inay Duran, učesnica muzičkog festivala „Djeca pjevaju hitove 2013“.





Takmičenje „Upozorenje na mine“

U organizaciji Crvenog križa Općine Ilidža u prostorijama Četvrte osnovne škole u Hrasnici održano je 17. općinsko takmičenje osnovnih i srednjih škola iz programa „UPOZORENJA NA MINE“. Prvo mjesto je osvojila Druga osnovna škola, drugoplasirana je Deveta osnovna škola, a treće mjesto zauzela je Treća osnovna škola Ilidža. Na ovom takmičenju učestvovala je devet osnovnih škola sa područja općine Ilidža. Druga osnovna škola će biti predstavnik na 17. kantonalnom takmičenju osnovnih i srednjih škola koje će se održati 23. novembra u prostoriji Osnovne škole Čengić Vila 1.



„Trgovina ljudima“

Najbrži načini zaštite sebe i drugih od otmice, prevare, transfera, prijetnje, seksualne eksploatacije, radnog iskorištavanja, zlostavljanja, nasilja, ponašanja prema uputama drugih uz upotrebu sile i slično, metode su o kojima se mladi žele informirati i znati ih primijeniti. Ali mladi žele i više od toga, žele sve što nauče preneti i svojim vršnjacima/kinjama kako bi se i ovi mogli pravilno zaštititi.

Na poziv Instituta za razvoj mladih KULT za trening vršnjačkih edukatora/ica o temi trgovina ljudima prijavilo je ukupno 266 mladih. Veliki broj prijavljenih potvrđuje da su mladi trgovinu ljudima prepoznali kao rastući problem u borbi protiv međunarodnog organiziranog

kriminala putem kojeg se žene, djeca i muškarci podvrgavaju raznovrsnim oblicima zlostavljanja, iskorištavanja i kršenja njihovih temeljnih ljudskih prava.

Trening o temi trgovina ljudima održat će se od 20. do 22. novembra u prostorijama Obrazovno-razvodnog centra za mlade Spjalica, ul. Banjska 2 u Ilidži, u organizaciji Instituta za razvoj mladih KULT, Njemačke razvojne agencije GIZ i Caritasa Biskupske konferencije u BiH.

Organizatori će od 266 prijavljenih odabrati 26 učesnika/ca treninga. Obzirom na veliku zainteresiranost mladih koji su prepoznali kvalitet i učinkovitost ove metodologije podizanja svijesti i rješavanja određene problematike, organizatori će do kraja godine organizirati još jedna trening za vršnjačke edukatore/ice o kojem će učesnici/e biti blagovremeno obaviješteni.

Učenici se družili s vatrogascima

Udruženje za zaštitu od požara i zaštitu okoliša/životne sredine „Mali vatrogasci“ iz Sarajeva uz finansijsku pomoć Općine Ilidža, 18. i 21. novembra 2013. održalo je edukativne časove u sklopu projekta „Vatrogasci naši prijatelji“, učenicima od prvog do petog razreda „Druge osnovne škole“ Hrasnica.

Predavanjima je bilo obuhvaćeno 17 odjeljenja. Ukupno je učestvovalo 367 učenika, od toga 198 dječaka i 169 djevojčica. Tokom edukacije učenici i njihovi nastavnici su upoznati sa različitim situacijama tokom požara i kako se tada ponašati.

Rad Udruženja za zaštitu od požara i zaštitu okoliša/životne sredine „Mali vatrogasci“ možete pratiti na web stranici udruženja www.malivatrogasci.com.



Usavršavanje poslovnih vještina

U organizaciji Udruženja mladih „Elan“ od 9 do 14. decembra 2013. godine održat će se obuka „Usavršavanje poslovnih vještina“ u Obrazovno-razvod-

nom centru za mlade „Spjalica“. Projekat finansira Općina Ilidža.

Svi zainteresirani mogu doći i na obuci naučiti pisati CV, kako otići na razgovor za posao, naučiti šta su finansijski proizvodi i kako postati dio uspješnog tima.

Prijave možete slati na e-mail: merima_salcin@Zume-lan.org ili putem telefona 062 /238-780.



Ilidžanci osvojili šampionat Kanade

Tim za koji nastupaju bivši fudbaleri Sarajeva, Željezničara, Slavije, Olimpika i Famosa osvojio je titulu „Canadian soccer league“ te tako postao državni prvak Kanade.

U timu Waterlooa našli su se Dado Hadrović, koji je ponikao u Sarajevu a zatim nastupao za FK Slovačko i FK Teplice iz Češke republike, Haris Fazlagić bivši fudbaler Slavije, Mirza Čolić ponikao u omladinskoj školi Željezničara, Adis Hasečić igrač Olimpika, te golman Famosa, Imad Hukara.

Ovi mladi Ilidžanci navode da su uslovi u SC Waterloo fantastični, počev od profesionalnog odnosa i odgovornosti prema igračima, discipline i rada na unutrašnjoj interpersonalnoj komunikaciji između saigrača i trenera, redovnosti plaćanja i brige oko cjelokupne potrebne infrastrukture.

Njihova briga su treninzi, uredan sportski život i kvalitetna međusobna komunikacija. To su preduslovi za uspjeh kakav su postigli.



Planovi naših talentiranih fudbalera su da nastave igrati u SC Waterloo-u i da svojim entuzijazmom pokažu kvalitet bosanskohercegovačkih fudbalera, te da otvaraju put mladim talentiranim fudbalerima u svijet koji poštuje talente.

Želja ovih mladih fudbalera je da se talentima u Bosni i Hercegovini pruža adekvatna podrška i da o njima priča i interes ne počinju onda kada uspješno nastupaju u dresovima klubova drugih država.

Tri medalje Akademiji

Takmičari Kick-boxing akademije Ilidža nastupili su na 15. Internacionalnom kickboxing kupu „Kutina 2013“. Kup se održao u Kutini 15 i 16. novembra 2013. godine, na kojem je nastupilo 400 takmičara iz sedam zemalja. Zlatnu medalju osvojio je Kenan Jahić u kategoriji -67 kg., srebrenu medalju Asmir Tahirović-63,5 kg. i bronzanu Edin Sinanović -57 kg, svi iz Akademije Ilidža.

U izuzetno jakoj konkurenciji takmičari su osvojili ove tri medalje. Turnir je poslužio kao provjera za mlade takmičare za „Croatia Open 2013“, koji će se održati 15. decembra u Zagrebu u dvorani „Dražen Petrović“.



Zimska liga u nogometu

Uorganizaciji Udruženja „Step Junior“ 17. novembra godine počela je Zimska liga u nogometu za dječake rođene 2002. godine i mlade. Ukupno je prijavljeno osam ekipa, a igrat će se po „Bergerovom“ sistemu-svako sa svakim.

Turnir se igra u sportskom centru M.G. MAS u ulici Munira Gavrankapetanovića br.3 i trajat će do 29. decembra 2013. godine i trajat će sedam nedjelja. Zvaničan naziv turnira je „Zimska liga-Step Junior-braća Merajić“, a organizira se u znak sjećanja na rahmetli braću Merajić koji su ubijeni zločinačkom granatom u maju 1992. Turnir je uz prisustvo nekoliko desetina takmičara i gledalaca svečano otvorio otac rahmetli braće Merajić, Hajrudin Merajić.

Predsjednik Upravnog odbora „Step Junior“ Kemal Habibija je u svom pozdravnom govoru izrazio nadu da će ova liga postati tradicionalna sa ciljem čuvanja uspomene na svu nedužnu ubijenu djecu opkoljenog Sarajeva. Turnir su svojim prisustvom, između ostalih, uveličali bivši nogometaši Sarajeva Emir Obuća i Amar Ferhatović kao i jedan od najperspektivnijih nogometnih menadžera Jan Skoblar iz Republike Hrvatske.



Odbojkašice Igmana bez poraza

Ženski odbojkaški klub „Igman” jesenji dio prvenstva završio je bez poraza. Mlada ekipa predvođena trenerom Senadom Hodžićem zabilježila je u pet odigranih utakmica isto toliko pobjeda. Nakon prošlogodišnje debitantske sezone u Prvoj ligi Federacije BiH u kojoj su zauzele treće mjesto ove mlade i talentovane odbojkašice u ovoj sezoni su na sigurnom putu da ostvare plasman u veći rang takmičenja, Super-ligu.

Ako se uzme u obzir da je ekipa sastavljena od djevojaka koje su ponikle u ovom klubu i da najstarije igraričice imaju tek 18 godina, rezultati koji se ostvaruju imaju još veći značaj.

U narednoj godini klub slavi 35 godina od osnivanja, a najbolji poklon za klub i ljubitelje odbojke na Ilidži bio bi plasman u veći rang takmičenja.

Seniorski tim takmičenje nastavlja u februaru, ali pauze u radu neće biti jer većina igraričica nastupa i za mlađe selekcije kluba čija takmičenja su na programu u naredna dva mjeseca. Važno je istaći da je kadetska ekipa tri godine zaredom bila prvak sarajevske regije i učesnik turnira za prvaka Federacije BiH. I ove godine u klubu očekuju prvo mjesto barem u jednoj kategoriji na regionalnom takmičenju.

U upravi kluba ističu izuzetno dobru saradnju sa Općinom Ilidža, bez čije podrške ne bi bili mogući rezultati koje postižu.